

volgens boazin. Dat kwam Hannes wel oet want daip in zien binste mos hai niks van peerden hebben, en Minoa was der ook nait zo weg van.

Om goud tien uur kwam Hannes mit peerd en woagen op kampeerterrain aan woar Minoa al mit haile kakje kloar ston. Zai hadden wel bekieks van aandere kampeergasten, dij hadden al dik lol en Minoa en Hannes hadden t ook braid noar t zin. Dus zai op den duur mor op pad. Zai hadden docht, ze mozzen mor noar Dwingeloo dwars deur t bos.



Bie ingang van t bos waren van dij spesioale plekken woar je mit kaar overheen mozzen, en doar begon

ellende. Kees duurde nait, hai dee gain stap meer veuroet. Hannes mos van bok oafkomen om Kees te helpen. Minoa bleef in kaar zitten. En dou ging alles zo snel, want dr kwam oet t bos n kobbel peerden, en of Kees doar van schrok, hai dee n stap veuroet, twij achteroet, linkerveurrad kwam in n koel en door viel huifkar mit haile hebben en hollen over de kop.

Wat n schrik, Minoa krabbelde weer overend oet huifkaar en haar gelukkeg niks broken. Alles was nog hail.

Ruters hebben hulpen dat kaar weer op roaden kwam, en dou zollen zai wieder. Ain van ruters vroug woar of ze hén wollen, noar Dwingeloo zee Hannes. Din goan joe wel hailndal verkeerde kaant op, dus Hannes en Minoa werden weer wieder holpen. Minoa was weer n beetje van schrik bekomen mor keek nait meer zo zunneg as ze eerst keken har.

Ze waren een stief ketaaier op pad en t ging meroakels mooi zolaang ze mor recht veuroet gingen, mor o wee as ze bocht om mozzen. As Hannes rechts wol, wol t peerd links en as Hannes links wol, ging Kees rechts. Körtom het was n maal baist. Hannes zien humeur wer ook al donkerder, t was net of der wat wolkjes veur de zun trokken. Ketaaier loater mos der volgens Minoa mor ais rust worden. Mit n kop kovvie en plak kouk der bie zaten ze even loater te genieten in baarm. Zun begon weer te schienen, der was gain wolkje meer aan de lucht.

Noa n pooske mor weer op pad, en zo laank ze mor recht deur gingen was der niks aan de hand, mor o wee as zai bocht om wollen. Hannes wer der op duur franterg van en hai zol Kees wel ais even helpen. Ho, zee Minoa, din wil ik eerst tou kaar oet, ik blief hier nait allain in zitten. Ze docht nog even aan heur kapriolen van n dik uur leden.